

Ni Presidente
Henry B. Eyring

Umuna a Mammagbaga
iti Umuna a Panguluén



Pammaneknek ken Pannakapasurot

Adda pagdumaan ti panangawat iti pammaneknek ti kinapudno ken panagbalin a pudno a napasurot. Kas pagarigan, impaneknek ti naindaklan nga Apostol Pedro iti Mangisalakán nga ammona a ni Jesus ti Anak ti Dios.

“Ni Jesus kinunana kadakuada, Ngem dakayo siasinoak ti panagkunayo?

“Ket simmungbat ni Simon Pedro, ket kinunana: Sika ti Cristo, ti Anak ti Dios a sibibiag.

“Ket simmungbat ni Jesus ket kinunana kenkuana: Nagasatka, Simon, anak ni Jonas; ta saan a ti lasag wenno dara, ti nangipaltiing kenka no di ket ni Amak nga adda sadi langit” (Mateo:15–17).

Ngem idi agangay, iti bilinna ken ni Pedro, inikkan ti Apo isuna ken datayo iti pangiwawan nga agbalin a pudno a napasurot ken mataginayon dayta a pannakapasurot iti tungpal biag. Kastoy kinuna ni Jesus: “Ket sika inton makapagbabawikan, pabilgem dagiti kakabsatmo” (Lucas 22:32).

Insuro ni Jesus ni Pedro nga adda pay la dakkal a panagbalbaliw a nasken a nalablaves pay ngem ti kaadda ti pammaneknek iti pannakabael nga agpanunot, makarikna, ken agtignay a kas pudno a napasurot a disipulo ni Jesucristo. Dayta ti nabileg a panagbalbaliw a kalkalikagumanayo amin. Apaman a magun-odtayo daytoy, kasapulantayo dayta a panagbalbaliw nga agtultuloy agingga iti gibus ti mortal a pannakapadastayo (kitaen iti Alma 5:13–14).

Ammotayo manipud iti bukodtayo a padas ken manipud iti panagserbitayo iti dadduma a saanto nga umdas ti kaadda ti sumagmamano a naindaklan a kanito ti naespirituan a bileg. Inlibak ni Pedro nga am-ammona ti Mangisalakán uray pay kalpasan a nakaawat iti saksi babaen ti Espiritu a ni Jesus ti Cristo. Ti Tallo a Saksi ti Libro ni Mormon ket addaanda iti direkta a pammaneknek a naited kadakuada a ti Libro ni Mormon ket balikas ti Dios, ngem idi agangay kimapuyda iti kabaelanda a mangkanunong ken ni Joseph Smith kas Propeta ti Simbaab ti Apo.

Kasapulantayo ti panagbalbaliw iti puspusotayo, kas naladawan iti libro ni Alma: “Ket inrakurakda amin kadagiti tao ti agpapada a banag—a nabaliwanen ti puspusoda; nga awanen ti tarigagayda a nga agaramid iti dakes” (Alma 19:33; kitaen met iti Mosiah 5:2).

Insuronatayo ti Apo a no pudno a napasurottayo iti ebangheliona, agbalbaliwto ti puspusotayo manipud kadagiti managimbubukod a pakaseknan iti serbisio a mangparegta iti dadduma bayat ti panagtignaytayo nga agturong iti agnanayon a biag. Tapno magun-od dayta a pannakapasurot, mabalintayo ti agkararag ken agrabaho a sipapammati tapno agbalin a baro a parsua a maaramid babaen ti Pannubbot ni Jesucristo.

Mairugitayo babaen ti panagkararag para iti pammati nga agbabawi iti kinamanagimbubukod ken para iti sagut ti panangipateg nga ad-adda pay kadagiti sabali ngem iti bagbagitayo. Makapagkararagtayo para iti bileg a mangikat iti kinapalangguad ken panagilem.

Ti kararag ti agbalinto pay a tulbek iti panangawat-tayo iti sagut ti ayat para iti balikas ti Dios ken iti ayat ni Cristo (kitaen iti Moroni 7:47–48). Agkadua dagiti dua. No basaen, utoben, ken ikararagantayo ti balikas ti Dios, maadaltayo nga ipateg daytoy. Inkabil ti Apo daytoy iti puspustayo. No mariknatayo dayta nga ayat, marugian-tayto nga ayaten ti Apo nga ad-adda pay. Babaen iti dayta sumangbayto ti ayattayo kadagiti sabali a kasapulantayo tapno mapapigsatayo dagitay inkabil ti Dios iti dalantayo.

Kas pagarigan, makapagkararagtapo tapno mangilasin kadagiti pasuruan ti Dios kadagiti misionario. Makapagkararag dagiti full-time misionario a sipapammati tapno maammuan babaen ti Espiritu no ania ti isuro ken ipaneknek. Makapagkararagda a sipapammati nga ipariknanto koma ti Apo ti ayatna iti tunggal maysa a maam-amma. Saanto a mayeg dagiti misionario ti tunggal maysa a maam-amma iti danum ti panagbuniag ken iti sagut ti Espiritu Santo. Ngem mabalinda a maaddaan iti Espiritu Santo kas maysa a kadkadua. Babaen ti serbisioda ken addaan iti tulong ti Espiritu Santo, dagiti misionario, kalpasanna, ket agbalbaliwto iti puspustayo iti dayta a panawen.

Mapabaronto dayta a panagbalbaliw manen ken manen bayat ti siaayat a panangitultulotayo nga agtignay a sipapammati a mangpapigsa kadagiti sabali babaen ti ebanghelio ni Jesucristo. Saanto a maysa laeng a pasamak ti pannakapasurot wenno conversion wenno maysa a banag nga agpaut laeng iti maysa a tiempo ti panawen ti biag no di ketdi agtultuloy a proseso. Makapagbalin ti biag a naranraniag agingga iti naan-anay nga aldaw, no makitayto ti Mangisalakken ken matakuatantayo a nagbalintayon a kas kenkuana. Inladawan ti Apo ti panagdaliasat iti kastoy: “Silaw dayta nagtaud iti Dios; ket isu nga umawat iti lawag, ken agtultuloy iti Dios, umawat iti ad-adu a lawag; ket rumanraniag a rumanraniag dayta a lawag agingga iti naan-anay nga aldaw” (DkK 50:24).

Ikarik kadakayo a posible dayta iti tunggal maysa kadaytoy.

PANANGISURO MANIPUD ITI DAYTOY A MENSAHE

Inusar ni Elder David A. Bednar ti Korum dagiti Sangapulo-ket-dua nga Apostol ti “pangngarig maipapan iti atsara” tapno isurona a ti pannakapasurot wenno conversion ket agtultuloy a proseso imbes a maminsan laeng a pasamak: “Binatog iti kada binatog ken pammilin iti kada pammilin, in-inut ken saan a madmadlaw, dagiti panggeptayo, dagiti panunottayo, dagiti balikastayo, ken dagiti aramidtayo agbalindanto a maikaykaysa iti pagayatan ti Dios” (“Ye Must Be Born Again,” *Liahona*, Mayo 2007, 19). Sublianyo nga adalen ti pangngarig maipapan iti atsara kadagiti sursuruanyo. Ania ti maaramid ti tunggal maysa kadaytoy tapno makapagtultuloytayo a sititibker iti in-inut a proseso ti pannakapasurot wenno conversion nga agpada nga inlawlawag da Presidente Eyring ken Elder Bednar?

AGTUTUBO

Panagbalbaliw ti Pusok

Ni Dante Bairado

Idi umuna a nasursurok maipapan ti naisubli nga ebanghelio ni Jesucristo, nariknak ti Espiritu a nagpaneknek iti kinapudno daytoy. Babaen ti kararag, nagbalin a napudpudno ti pammaneknekk, ket inkeddengko ti agpabuniag.

Nabiit kalpasan ti panagbuniagko, nangrugi a nagsaludsod kaniak dagiti tao iti wardko no kasano ti riknak maipapan iti panagserbi iti mision. Kinapudnona, diak ammo idi no ania ti sawek. Kasla nakakatkatawa ti ideya a panangpanaw iti pamiliak ken isardeng ti panagdalko tapno agserbiak iti mision.

Kalpasanna iti maysa nga aldaw pinampanunotko maipapan iti conversionko. Nalagipko dagiti misionario a nangisuro kaniak, a siaanus a nangsungbat kadagiti saludsodko ken nangtulong kaniak tapno maawatak ti ebanghelio. Naamirisko a no awan ti tulongda, diak koma iti kaano man natakuatan ti pudno a Simbaan. Apaman a naaramidko dayta a panangamiris, nagbukar iti pusok ti tarigagay nga agserbi. Mariknak ti Espiritu a mangibagbaga kaniak a nasken nga agserbiak iti full-time a mision.

Ammok a ti aramid ti misionario ket aramid ti Nailangitan nga Amatayo ken makatulongtayo a mangisangbay kadagiti kararua iti nakaskasdaaw a pannakaammo ti naisubli nga ebanghelio.

Agnanaed ti nagsurat iti Fortaleza, Brazil.

ANNAK

Parayrayenyo Koma ti Pammaneknekyo

Ti pananggun-od iti pammaneknek ket kasla panangaron iti apuy. Kas iti panangnayon iti sungrod tapno agtalinaed nga umap-apuy, nasken nga agkararagtayo, agbabawitayo, agserbitayo kadagiti sabali, agadaltayo kadagiti nasantuan a kasuratan, ken agtungpaltayo kadagiti bilin tapno makatulong a rumayray dagiti pammaneknektayo.

Tapno masursuro ti ad-adu pay maipapan iti panangpapigsa iti pammaneknekyo, basaen ti tunggal maysa kadagiti nasantuan a kasuratan a nakalista iti baba. Mangidrowing iti maysa nga apuy nga addaan iti lima a dadakkel a gil-ayab. Koloranyo ti maysa a gil-ayab iti tunggal nasantuan a kasuratan a binasayo. Ti ad-adu a nasantuan a kasuratan a nabasayo, naranraniang ti apuy—ken ti pammaneknekyo!

Mosiah 2:17

Alma 5:46

Alma 32:27

3 Nephi 15:10

Juan 5:39



Pammati, Pamilia, Tulong

Dagiti Kababalin ni Jesucristo: Awanan Basol

Nainkararagan nga adalenyo daytoy a material ken kalikagumanyo nga ammuen no ania ti ibinglayyo. Kasano a ti pannakaawatyo iti biag ken mision ti Mangisalakan ket mangpapigsa iti pammatiyo Kenkuana ken mangparabur kadagiti ay-aywananyo babaen ti visiting teaching? Para iti ad-adu pay nga impormasion, mapan iti reliefsociety.lds.org.

Daytoy ti paset ti maysa a serye dagiti Mensahe iti Visiting Teaching a mangitampok kadagiti aspekto ti mision ti Mangisalakan.

Ti Mangisalakantayo, ni Jesucristo, ti kakaisuna a makabael a mangaramid iti pannubbot para iti sangkatawan. “Ni Jesucristo, ti Karnero nga awanan iti mulit, siaayat nga impaiddana ti Bagina iti rabaw ti altar a pagidatongan ket inkaronan dagiti basbasoltayo,” kinuna ni Presidente Dieter F. Uchtdorf, Maikadua a Mammagbaga iti Umuna a Panguluen.¹Iti pannakaawat nga awan basolna ni Jesucristo ket makatulong kadaytoy a mangpadakkel iti pammatitayo Kenkuana ken mangkarigatantayo nga agtungpal kadagiti bilinna, agbabawi, ken agbalin a natarnaw.

“Ni Jesus ket . . . maysa a nabia nga addaan lasag ken espiritu, ngem saan a nagpasulisog (kitaen iti Mosiah 15:5),” kinuna ni Elder D. Todd Christofferson ti Korum dagiti Sangapulo-ket-dua nga Apostol. “Makaasidegtayo Kenkuana . . . gapu ta maawatanna. Maawatanna ti pannakibakal, ket maawatanna pay no kasano ti panangabak iti pannakibakal. . . .

“ . . . Ti bileg ti Pannubbotna ket mabalinna a pugasen dagiti epekto

ti basol kadaytoy. No agbabawitayo, ti pangsubbot a paraburna ket mangikalintegangan ken mangdalus kadaytoy (kitaen iti 3 Nephi 27:16–20). Daytoy ket no saantayo a nagpaabak, no saantayo a nagpasulisog.

“No itrabahotayo iti inaldaw ken linawas a mangsuot iti dalan ni Cristo, ipatalged ti espiritu ti kinaindaklanna, tumalinaay ti dangadang iti kaunggan, ken agsardeng a mangrilibuk dagiti pannulisog.”²

Dagiti Mainayon a Nasantuan a Kasuratan

Mateo 5:48; Juan 8:7; Hebreo 4:15; 2 Nephi 2:5–6

Manipud kadagiti Nasantuan a Kasuratan

Inkaro ti Mangisalakan dagiti basbasoltayo babaen ti nadosan a Kinaanakna, ti awan basolna a biagna, ti panagsagaba ken ti panagsayasay ti darana iti Minuyongan ti Getsemani, ti ipapatayna iti krus ken ti Panagungarna manipud iti tanem. Babaen ti Pannubbot ni Jesucristo, makapagbalintayo a nadalus manen no agbabawitayo kadagiti basbasoltayao.

Insuro ni Ari Benjamin kadagiti taona maipapan iti Pannubbot ni Jesucristo ket kalpasanna

sinaludsodna ida no mamatida kadagiti balikasna. “Sangsangka-maysada a nangidir-i, a kinunada: ti Espiritu . . . nangipaay iti naindaklan a panagbalbaliw kadakami, wenno iti puspusomi, nga awanan kadakami ti tarigagay nga agaramid iti kinadakes, ngem ti ketdi agtultuloy a panagaramid iti kinaimbag. . . .

“Ket siaayatkami a makitulag iti Diosmi nga agaramid iti pagayatanna, ken agtungpal kadagiti bilinna iti amin a banag” (Mosiah 5:1–2, 5).

Mabalintayo met ti maaddaan iti “naindaklan a panagbalbaliw” kas kadagiti tao ni Ari Benjamin, nga “awanen ti tarigagay nga agaramid iti kinadakes, ngem agtultuloy a panagaramid iti kinaimbag” (Mosiah 5:2).

DAGITI NAGADAWAN

1. Dieter F. Uchtdorf, “You Can Do It Now!” *Liahona*, Nob. 2013, 56.
2. D. Todd Christofferson, “That They May Be One in Us,” *Liahona*, Nob. 2002, 71.

Ibilang Daytoy

Kasano a maigiddiat ti panagbalin a natarnaw iti panagbalin a naan-anay?